

Pabien Parlamento Hubenil

Minister Michelle Hooyboer-Winklaar: E voz di Parlamento Hubenil ta resona mas y mas den nos comunidad



ORANJESTAD (AAN): Diabierna anochi na e celebracion di e di 10 aniversario di Parlamento Hubenil, Minister di Asuntonan Economico, Asuntonan Social y Cultura Michelle Hooyboer-Winklaar a expresa palabranan di aprecio pa e rol cu e instancia prominente aki ta hunga den nos comunidad. Parlamento Hubenil no a sa solamente di crece den cantidad, pero tambe den nan presencia den nos comunidad, e mandatario a comenta.

“Nan voz mas y mas ta resona den nos comunidad y Parlamento Hubenil ta worde mira como e instancia cu ta representa nos hobennan na

Aruba,” Minister Hooyboer-Winklaar a bisa.

Parlamento Hubenil sin duda ta un instancia importante y ta contribui na e cumplimento cu e derecho internacional di mucha, inclui den e tratado di Nacionnan Uni, cual ta e derecho di participacion. Minister Hooyboer-Winklaar a splica cu participacion di cada hoben y mucha den e desaroyo di su pais ta importante y nan voz mester worde scucha. El a duna credito na ex-minister di asuntonan social, Drs. Marisol Lopez-Tromp pa su vision y determinacion pa institui un Parlamento Hubenil na Aruba y a gradici tur

persona cu e yuda guia e organizacion y traha cu nan incansablemente durante e ultimo 10 añanan.

Minister Hooyboer-Winklaar a menciona cu tabata un placer pa scucha e testimonio di diferente ex-miembro, kende of ta studiando den exterior of ya a caba di studia y ta back na Aruba trahando. El a bisa cu hopi biaha ta tende di hobennan cu no ta den bon caminda, pero den e caso aki, e hobennan no solamente ta exactamente riba e rumbo corecto, pero tambe ta inspira otro hoben pa sigui nan ehempel.

E muchanan cu drenta Parlamento Hubenil ta resulta den personanan cu disciplina, cu pasion y vision pa loke nan kier den bida y loke nan kier logra den bida, algo cu ta sumamente positivo, Minister Hooyboer-Winklaar a subraya. El a añadi cu e instancia aki a bira un parti importante di nos comunidad, treciendo e voz di nos hobennan padilanti, cu mester sigui crece y sigui desaroya pa hopi aña mas.

